

Naalakkersuisut persuttaasarneq akiorniarlugu periusissiaat iliuusissatullu pilersaarussiaat

(Ilaqutariinnermut Inatsisinullu Atuutsitsinnermut Naalakkersuisoq)

Saqqummiussissut

(Ilaqutariinnermut Inatsisinullu Atuutsitsinnermut Naalakkersuisoq)

Siullermeenera

Nuannaarutigaaara, inuiaqatigiisugut ilutsinni annertuumik persuttaasarneq akiorniarlugu ataatsimut isiginnittumik periusissiaq iliuusissatullu pilersaarut pillugit Naalakkersuisut siunnersuutaat saqqummiussinnaagakku.

Naalakkersuisut isumaat erseqqissuuvoq: Persuttaasarneq inunnut allanut pinerliineruvoq nikanarsaanerullunilu inuiaqatigiisugut ilutsinni akuerisinnaangisarput. Persuttaasarneq qaangersinnaangilarput isummat iliuuseqarnermik malitseqartinnikkutsigit. Ilisimavarput persuttaasarneq persuttaanerulersarnermit malitseqartartoq. Taamaammat persuttaasarnermut akiuiniarluni sunniuteqarluartumik suliniuteqarnikkut taamatut iliuuseqartarneq unitsinneqassaaq, tassami ullumikkut persuttarneqartatut siunissami persuttaasartunngortarmata. Tassa suliniutit anguneqarnissaat tunaartaralugu aalajangiussimaneqarnissaallu pillugit tamatta suliaqarnissarput pisariaqarpoq.

Namminiilivinnissaq oqallisigigaangatsigu amerlanertigut aningaasaqarneq oqallisigisarparput. Namminiilivissagutta aningaasaqarnikkut imminut napatissinnaanerput pinngitsoorani tunngaviasariaqarpoq. Eqqaamassavarpulli, uani aningaasaannaat pineqanngimmata aammali inuit pineqarmata. Tassami inuit tassaagamik aningaasaqarnermik ineriartortitsisuusartut. Taamaammat innuttaasut nukissaqarluartut sulerusussuseqartullu pisariaqartippavut, taamaaliussaguttalu inuit atortariaqarpavut. Taamaaliunngikkutta - Nunatta ineriartortinneqarneranut inuppassuit isiginnaaginartunngortissinnaavagut.

Persuttaasarneq ajortuuvoq, inunnillu tapertaanissamut peqataarusussuseqarnermullu ilip-panaatilinnik tunuartitsisarpoq immikkoortitsisarunilu. Ajoraluartumik inuiaqatigiisugut ilutsinni persuttaasoqarpallaaqaq. Assersuutigalugu "Inuusuttut Atugarisaat" pillugit misissuinerup 2011-meersup takutippaa, inuusuttut quliugaangata sisamangajaat anaanamik persuttarneqarnerat isigisarsimavaat. Taassumaannaap takutippaa, inuiaqatigiit annertuumik suliasatigut unammilligassaqartut. Meerartatta toqqissisimanerpaaffigisariaqagaanni; tassalu angerlarsimaffimmi, toqqissisimannginnerat taamaaginnartussatut isigissavarput?

Persuttaasarneq akiorniarlugu periusissiasatut iliuusissatullu pilersaarummut Naalakkersuisut siunnersuutaanni pingaarnerpaatinneqarpoq, ilaqutariinni persuttaasarnerup pitsaaliorneqarnissaa unitsinneqarnissaalu, tassa ilisimagatsigu persuttaasarneq meeqqat atugaqarnerannut ineriartornerannullu ajortumik kinguneqartartoq. Meeqqat angerlarsimaffimmi persuttaaffiusartumi alliartortut persuttarneqarnissamut imaluunniit allanik persuttaanissamut kinguaassiuutitigullu innarliinissamut annertuumik ulorianartorsiuteqartuupput. Angajoqqaat persuttarneqartatut ilaatigut ajornakusoortissinnaavaat ilinniakkamik naammassinninnissaq, suliffimminnik attassiinnarnissaq meeqqaminnullu pitsaasumik maligassiunissaq, angajoqqaammi amerlanerit maligassiuisuunissartik kissaatigisarivaat.

Akilerartarnermut Atugarissaarnermullu Ataatsimiititaliap isumaliutissiisummini allappaa, qanitariit akornanni persuttaasarnerit inuunikinnerusarnermik, sivisuumik napparsimasarnermik, tarnikkut

ajornartorsiuteqartarnernik napparsimallunilu sulinningitsoortarnernut uppersarsarneqarsinnaasumik atassuserneqarsinnaasut. Aammattaaq uppersarsarneqarsimavoq, Kalaallit Nunaanni arnanut persuttaasernerit tassanngaannartumik anigorsinnaanngisamillu peqqiilliuteqalartarnernik kinguneqartartut. Taamaammat Ataatsimiititaliap inassutigaa, suliniutini tamani atugarissaalersitsinissamik, peqqissuunissamik inooqatigiinnissamillu siunertaqartuni persuttaasarnermik ajornartorsiuteqarneq ilanngullu eqqarsaatigineqartassasoq.

Persuttaasarneq akiorniarlugu periusissiassatut siunnersuummi isumalioqatigiissitap inassuteqaatai aallaavigineqarput, iliuusissatulli pilersaarummi suliniutissat anguniakkanut sisamaasunut sammitineqarlutik:

Persuttarneqarsimasut pitsaannerusumik tapersersorneqarnissaannik siunnersorneqarnissaannillu neqeroorfigissavagut

Persuttaasarneq unitsissavarput – ilaatigut persuttaasartut katsorsarneqarnissaannik neqeroorfigisarlugit

Ilaqutariit persuttaaffiusartut eqqarsaatigalugit susassaqaqatigiit akimorlugit suleqatigiilluarnunissaq ineriartortissavarput

Persuttaasarneq pillugu ilisimasat paasissutissiisarnerlu annertusassavagut

Persuttaasarneq akiorniarutsigu pingaaruteqarpoq, ajornartorsiutip ammasumik oqaloqatigiissutiginnissaa, aamma persuttaasarnep pinerliinerunera akuersarneqarsinnaannginneralu pillugit erseqqissumik takutittarnissaa. Ajornartorsiulli pillugu oqaloqatigiinnikkuinnaq persuttaasarneq qaangersinnaanngilarput. Iliuuseqarnissarli aamma pisariaqarpoq. Taamaammat persuttaasarneq akiorniarlugu suliniutissat tigussaasut pilersaaruserluakkallu Naalakkersuisut siunnersuutigalugit saqqummiuppaat.

Persuttaasarnep ukiut tamaasa innuttaasorpasuarunik attuisartup inuiaqatigiinnullu akisoorsuup ullormit ullormut atorunnaarsinneqarsinnaanera Naalakkersuisut takorloorsinnaanngilaat. Taamaattoq meeqqat inersimasullu persuttagaallutik inuuneqartut amerlassusaat malunnartumik ikilisinniarlugit paatsoorneqarsinnaanngitsumik anguniagaqarsinnaavugut. Naalakkersuisut neriutigaat, siunnersuut Inatsisartunit tapersersorneqassasoq, tassa persuttaasarneq ataatsimoorluta akiorniassagatsigu.

Taamatut oqaaseqarlunga oqallilluarnissassinnik tamassi kissaappassi.